

## 脫兔集

### 七夕將至紀夢

今夕正良夜，忽然臨勝概。涼吹動碧水，興有蘭舟載。波心熠耀現，此景真絕代。潭星掬在手，轉眼成珠佩。得之適其時，佳節屈指內。卞和固前轍，瑰璋唯君配。欲寄轉踟躕，恐成連環碎。翻憂今不寄，他年豈生悔。百思真無功，歸來空感慨。如何羨牛女，萬里長相對。

### 跛鴨行

故園前路同茫茫，瓏瓏寒夜耳目僵。車流誰聞怖聲在，身一團白尋深藏。偶脫貨車失處所，翻飛顛羽無裹糧。忽得過客施小憫，倖免束手投屠場。植物園幽餘生在，風搖寤寐夢初長。偶行輕影映瘦石，時破秋水依斜陽。但憶同群籠間眾，天寬夢窄終寒鋌。恆沙微命豈不一，何苦相噬皆愁腸。祈現清涼三千畝，不教人世還探湯。

### 蜂蜜檸檬記市長選舉

榨取香檬洩玉杯，清歌有此好登臺。蜜房還待君收盡，再向黎民醉一回。

### 鬧鐘

深愁蟻磨夢中行，逆旅勞人各自營。請入房中頻作警，盡遮遼鶴費心鳴。

### 螢<sup>1</sup>

側身都邑尋常夜，昂首沉思未見星。幾時邀得同幽客，借我囊中數點螢。

### 櫻花二首

騷客小園衝冷雨，祇憂明日復青青。仰看花樹低聲問，欲話冬心聽不聽。

冬心何故似春心，一寸劫灰焚至今。空有雨來涼徹骨，何堪立到翠成陰。

大疫漸息，余除夕前確診新冠，以詩為記

新痾侵歲尾，春事轉無關。萬景歸強健，孤雲慰空閒。支頤虛似水，堆案愧成

---

<sup>1</sup> 折腰體

山。難遣花時好，夢中聊解顏。

#### 圖書館外孤櫻

書館翻書罷，歸途作小遊。粉瓊何自好，過者未相留。歲月難平水，素懷無岸舟。  
還期他日會，詞客淚休流。

#### 望遠有懷再用舟韻

自向危欄倚，為君凝遠眸。乾坤都入望，愚直待誰儔。宿願江中月，芳心陸上舟。  
寒風如我意，應不到紅樓。

#### 暑假初晴日返校有懷

上庠幽寂已晴空，步向池園熟路通。雲入絮黏成底事，花銷酒祓到深衷。微波泉  
瀑愁時語，合唱歌詩昨夜風。錦鯉若知應笑我，相濡相忘總無功。

#### 雨夜與友朋群組聊天

網路有情能縮地，寒燈各對語依依。每憐身事二三子，深慨人情千百非。竹塹自  
怡樓納月，剡溪難忍雨沾衣。倘如相憶還相訪，笑得明朝朽木譏。

#### 未寄

某君來臺讀大學，與余相識，情契深篤。後因余私事微生嫌隙，雖交誼猶存，  
然不復如昔。卒業後，某君離臺求職，偶有音問。近日詩社以友誼為題，命做七  
律一首，故援筆成章，聊寓寸心。

人事漸知波上萍，涓流歲月太無形。舊交沙散終何必，幽夢雲飛悟所經。歸去長  
身君邈邈，消磨短髮自星星。淡江風雨徒重對，隔海爭能寄與聽。

#### 蝶戀花·最後一次送故人歸

共踏歸途春漸盡。晚色蒼茫，陳跡從誰認。玉兔嬋娟雖已近。何如牛女相思分。  
蝶去鶯來休更問。錯數花期，晴雨渾無準。草結同心曾寸寸。別時撒做彌天恨。

#### 高陽臺·和學弟吹笛溪橋上詞

一水橫橋，層雲滿眼，蕭蕭綿到溪頭。顧影徘徊，誰曾拾翠芳洲。留連細草侵君  
坐，任笛聲、一曲多愁。更何人、雨夜西窗，雪夜輕舟。人生豈得長無調，  
怕青衿漸暗，紅葉空流。料想哀音，風吹凌亂難收。新詞寫罷應相寄，莫還教、

魚雁悠悠。奈如今、秋雨秋山，各倚重樓。